

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA
Broj: **02-01-245/21**
Mostar, 24.11.2021. godine

IZVOD IZ ZAPISNIKA
sa šesnaeste (XVI) redovne sjednice Skupštine
Hercegovačko-neretvanskog kantona

Sjednica je održana dana 24.11.2021. godine u sali Centra za kulturu u Mostaru sa početkom rada u 12:00 sati

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

Prisutni: Marija Bešker, Slavko Bilić, Marija Bošković, Stana Burić, Damir Džeba, Elvedin Grcić, Nevenko Herceg, Julineta Jurić, Tomislav Martinović, Ivan Odak, Andrea Pehar, Milica Pehar, Amir Šelo, Šerif Špago, Minela Krpo, Nermin Vrtić, Aner Žuljević, Iva Raguž, Vesna Saradžić, Selma Drljević, Đuro Prkačin, Edis Džino, Slaven Raguž, Irma Memidžan, Vera Konjevod, Ismet Lulić i Mejrima Hasić.

Odsutni: Zora Dujmović, Alisa Hajdarović i Ajdin Teletović.

Konstatovano je da je na sjednici prisutno **27** poslanika, te da postoji kvorum za rad i punovažno odlučivanje.

Prisutni po pozivu: predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Predsjedavajući Skupštine obavijestio je poslanike da je u materijalima dostavljen prijedlog dnevnog reda koji je utvrdio Kolegij Skupštine.

Otvorena je rasprava po prijedlogu dnevnoga reda.

U raspravi su učestvovali: Slaven Raguž, Elvedin Grcić, Tomislav Martinović, Šerif Špago, Aner Žuljević i Nevenko Herceg.

Usljedila je pauza.

Nakon pauze, predsjedavajući Skupštine HNK Šerif Špago je izvjestio zastupnike da je Kolegij Skupštine HNK nakon konzultacija dogovorio prijedlog dopune dnevnog reda slijedećim tačkama:

Tačka 8. Zaključak o trenutnom stanju u dijelu zdravstvenih ustanova u HNK-a;

Tačka 9. Zaključak o dostavljanju izvještaja o realizaciji zaključka Skupštine HNK-a broj 02-01-017/21, od 26.01.2021. godine.

Obavljeno je glasanje o dopuni dnevnog reda navedenim tačkama.

Nakon glasanja konstatovano je da su navedene tačke postali sastavni dio dnevnog reda (XVI) redovne sjednice Skupštine.

Obavljeno je glasanje o dnevnom redu

Nakon glasanja konstatovano je da je jednoglasno usvojen dnevni red šesnaeste (XVI) redovne sjednice Skupštine HNK.

Usvojeni Dnevni red:

1. Poslanička pitanja;
2. a. Odluka o prestanku mandata poslanika u Skupštini HNK;
b. Odluka o verifikaciji mandata poslanika u Skupštini HNK;
3. Prijedlog Strategije razvoja HNK-a za period 2021. – 2027. godina;
4. Prijedlog Zakona o izmjenama i dopunama Zakona o poljoprivrednom zemljištu u HNK;
5. Nacrt Zakona o termoenergetskoj inspekciji;
6. Nacrt Zakona o elektroenergetskoj inspekciji;
7. Izmjena i dopuna Odluke o izboru predsjedavajućeg, zamjenika predsjedavajućeg i članova radnih tijela Skupštine HNK;
8. Zaključak o trenutnom stanju u dijelu zdravstvenih ustanova u HNK-a;
9. Zaključak o dostavljanju izvještaja o realizaciji zaključka Skupštine HNK-a broj 02-01-017/21, od 26.01.2021. godine.

Jednoglasno je usvojen Izvod iz zapisnika sa XV. Redovne sjednice Skupštine HNK.

AD 1. Poslanička pitanja

Julineta Jurić:

Poštovane kolegice i kolege, sve vas zajedno pozdravljam. Za današnju sjednicu skupštine imam inicijativu koju upućujem Vladi HNŽ-a, prednost studenata s rektorovom nagradom za pripravnički staž HNŽ-a. Izvrsnost trebamo nagrađivati, zato predlažem da se studenti nagrađeni rektorovom nagradom za svoj trud i rad tijekom akademskog obrazovanja direktno primaju za vježbenički staž u županijska tijela uprave, upravne organizacije i druge službe, tijela i institucije HNŽ-a. Potrebno je iznaći način da izvrsne studente motiviramo da ostaju u državi u kojoj su se i obrazovali, a ovo bi bio jedan od načina motivacije i ostanka.

Još jedna inicijativa za Vladu HNŽ-a, sufinansiranje upisnina studentima deficitarnih zanimanja. Sufinancirati školarine studentima na Sveučilištu u Mostaru i Univerzitetu Džemal Bijedić na način da se dio sredstava koji osigurava Vlada HNŽ-a visokoškolskim ustanovama direktno prenamjeni za tu svrhu. Pravo na sufinansiranje ostvaruju redoviti studenti deficitarnih zanimanja koji prvi put redovito upisuju svaku narednu akademsku godinu svojeg studija. Obrazovanje mora biti prioritet, a ne privilegija manjine. Ne smijemo biti ravnodušni prema obrazovanju kako bi svima, a poglavito mladima, bila osigurana kvalitetna budućnost kakvu i zaslužuju.

Još jedna inicijativa, Ministarstvu prosvjete, znanosti, kulture i športa HNŽ-a, izjednačenje koeficijenta tajnika i stručnih suradnika s koeficijentom profesora u srednjim školama. Već dugi niz godina tajnicima i stručnim suradnicima uposlenim u srednjim školama na području HNŽ-a nanosi se velika nepravda jer su u odnosu na kolege profesore neutemeljeno zakinuti u plaćama. Naime, još prije par godina u Ministarstvu prosvjete, znanosti, kulture i športa HNŽ-a usvojena je odluka prema kojoj je tajnicima određen koeficijent od 2,0, stručnim suradnicima srednjih škola, pedagogima 2,16, profesorima je određen koeficijent od 2,22 bez obzira na istu stručnu spremu. S obzirom na odgovornost i složenost poslova koje obavlja tajnik te činjenicu da je koeficijent tajnika u osnovnim školama- viša školska sprema izjednačen sa nastavnicima, smatram da ista mjerila treba primjenjivati i u srednjim školama, to jest izjednačiti koeficijent tajnika sa visokom stručnom spremom s koeficijentom nastavnika visoka stručna sprema. U srednjim školama HNŽ-a ima 28 pedagoga, a razlika u plaći je samo 33 KM, što znači na mjesečnoj razini je to 924 KM i vjerujem da za Ministarstvo prosvjete, znanosti, kulture i športa HNŽ-a ovo nije veliki izdatak za budžet. Stoga vas molim da upotrijebite svoje ovlasti kako biste ispravili navedenu nepravdu te prekinuli diskriminaciju koja se provodi godinama. Hvala.

Vesna Saradžić:

Zahvaljujem predsjedavajući. Dobar dan svima i pozdravljam sve koji učestvuju u radu ove današnje sjednice. Evo ja imam danas 3 pitanja, a sticajem okolnosti sva su pitanja upućena Vladi HNK-a, odnosno premijeru. Vrlo često se govori o privlačenju investitora i jačanju privrede i apliciranju za projekte koje finansira Evropska Unija, zato postavljam pitanje Vladi HNK-a, odnosno premijeru HNK-a, dali u okviru Vlade HNK-a egzistira kancelarija za evropske integracije, koliko ima zaposlenih i kojih kvalifikacija i koliko je do sada tim putem osigurano sredstava iz fondova Evropske Unije?

Drugo pitanje. Tragom informacije, odnosno Vladine najave o raspisivanju konkursa za 215 radnih mjesta u obrazovanju HNK-a, molim da mi se dostave podaci o trenutnom broju učenika i prosvjetnih radnika u školama HNK-a i uporedni podaci u odnosu na prethodne godine, odnosno obrazovne cikluse?

I treće pitanje. Dali su u toku aktivnosti po pitanju digitalizacije Covid potvrda vezano za QR kod koji prati tehničke standarde Evropske Unije, naravno i to i Vladi i premijeru pitanje? Zahvaljujem.

Iva Raguž:

Zahvaljujem predsjedatelju. I srdačno pozdravljam sve nazočne. Svoje zastupničko pitanje upućujem Vladi HNŽ-a, Ministarstvu zdravstva, rada i socijalne skrbi HNŽ-a i Ministarstvu prosvjete, znanosti, kulture i športa HNŽ-a, a ono glasi: dokle je došla realizacija zaključaka koje je donijela Skupština HNŽ-a na sjednici održanoj 10.11.2015. godine? Doneseni zaključci su sljedeći: pod 1) zadužuje se Vlada HNŽ-a da u roku od 15 dana formira tim na način kako ga je predložio resorni ministar zdravstva, rada i socijalne zaštite koji će pripremiti nacrt akcijskog lokalnog plana za HNŽ-e, pod 2) zadužuje se Vlada HNŽ-a da formira koordinacijsko tijelo koje će biti sastavljeno od predstavnika ministarstava i koalicije udruga sa ciljem praćenja i koordiniranja aktivnosti na realizaciju planova akcije, pod 3) zadužuje se Vlada HNŽ-a da pokrene program asistenata u nastavi od drugog polugodišta školske 2015./2016. godine te da koristi pogodnosti zakona o volontiranju i programa prijema i upošljavanja pripravnika, pod 4) zadužuje se Ministarstvo zdravstva, rada i socijalne zaštite HNŽ-a da u okviru ministarstva ustanovi referat kojem će nadležnost biti koordinacija, praćenje i suradnja sa udrugama koje se bave pitanjima osoba sa invaliditetom, pod 5) zadužuje se Vlada Ministarstvo obrazovanja, znanosti, kulture i športa HNŽ-a da izvrši korekciju nastavnih planova i programa i prilagodi ih položaju invalidnih osoba u cilju njihove integracije u društvo, pod 6) zadužuje se Vlada HNŽ-a da kroz izmjene postojećih propisa omogući pristup i mobilnost invalidnih osoba u javnom prijevozu, u javnim objektima i parking prostorima, pod 7) zadužuje se Ministarstvo zdravstva, rada i socijalne skrbi HNŽ-a da razmotri mogućnost pokretanja rada centara za fizikalnu i mentalnu rehabilitaciju pri domovima zdravlja u HNŽ-u. Ministarstvu prosvjete, znanosti, kulture i športa HNŽ-a upućujem inicijativu da indikatore za inkluzivno obrazovanje prezentira zastupnicima u Skupštini HNŽ-a. Obrazloženje: indikator za inkluzivno obrazovanje je dokument koji se direktno naslanja na način provedbe inkluzivnog obrazovanja u HNŽ-u i smatram da je bitno da se zastupnici upoznaju sa istim, osobito jer je čitav dokument uvršten u provedbu inkluzivnog obrazovanja unutar ministarstva obrazovanja i samim time ima finansijsku procjenu. Dakle, trebaju se izdvojiti sredstva da se svakom djetetu omogući inkluzivno obrazovanje. Zahvaljujem.

Ivan Odak:

Pozdravljam sve prisutne na ovoj sjednici skupštine. Imam inicijativu i dva pitanja. Upućujem inicijativu kolegiju Skupštine i Vladi HNŽ-a da iznađu rješenje za uposlenike ministarstva unutrašnjih poslova koji su stekli uvjete i imaju pravo na punu mirovinu i po sili zakona zbog navršenih 65 godina ili 40 godina mirovinskog staža. Time bismo riješili status tih ljudi ili njihovih porodica ako je djelatnik preminuo, a nema riješen status. Smanjili bismo i financijske izdatke za bruto plaće i ostala davanja, a oslobodili bismo radna mjesta mlađim ljudima. Koliko sam upoznat završeni su intervjui kandidata za neovisno povjerenstvo za izbor ravnatelja policije, pa tražim informaciju kada ćete završiti sa tom procedurom, to jest kada ćete oformiti to povjerenstvo?

Moje drugo zastupničko pitanje. Žao mi je ovdje nema ministra Faladžića, čekam ga od 30.04. ove godine, pa ga nikako dočekat, ministre financija Adnane Faladžiću, pitam vas kada ćete izići pred javnost i iznijeti kakvo je stanje u Ministarstvu financija? Naime, na 12. sjednici skupštine održane 30.04.2021. godine sam tražio od vas informaciju o padu servera, niste mi je dali, obećali ste napismeno. Zaključkom broj 6 sa 13. sjednice održane 31.05.2021. godine zadužuje se Vlada HNŽ-a i Ministarstvo financija da do naredne sjednice Skupštine HNŽ-a dostave informaciju o problemima u sustavu obračuna plata proračunskih korisnika HNŽ-a, do danas ništa od toga. Evo sada će 8. proračun Vlade HNŽ-a koji vi predlažete Skupštini na usvajanje, možemo li znati koliki iznos po presudama tužbi ste naslijedili od prethodne Vlade? Moja informacija koja imam je cirka 20.000.000 KM. Isplatili ste od 2015. godine oko 20.000.000 KM, čujem ovih dana će se isplatit cirka 3.500.000 KM, a sada je duga preko 50.000.000 KM. Kako vi kao ministar financija to objašnjavate, što predlažete kao rješenje? Ovo su problemi koje treba rješavati, a vi ste ta odgovorna osoba koje nema u javnosti od ožujka mjeseca i problema sa serverom Očekujem od vas konkretne i jasne odgovore na svu problematiku iz ministarstva financija. Zahvaljujem.

Nevenko Herceg, predsjednik Vlade HNK:

Jučer smo na sjednici Vlade, radi korektnosti, mi djelujemo kao Vlada, ministar je usmeno izložio i mi smo primili k znanju informaciju o stanju servera usmeno na znanje i zatražili od ministra da dopuni informaciju sa mjerama, aktivnostima i o svemu onome što je poduzeto. To je radi korektnosti.

Sudske presude, da. Ne volim govorit o vremenu iza nas, ali vrijeme prije nas je dovelo da smo mi zatekli 20.000.000 KM glavnice i 16.000.000 KM kamata i sudskih troškova. Međutim, to nisu sve bile zaknjžene presude, nama i dan danas stižu presude iz ranijih razdoblja, i to stvara zabunu. Mi jesmo riješili 20.000.000 KM do sada u mandatu ove Vlade, dominantno kroz ove izvansudske nagodbe i one su dobile prioritet. Jučer smo na sjednici Vlade donijeli odluku da isplatimo dodatnih 3.038.000 KM, oko 2.038.000 KM ove po nagodbi i 1.000.000 KM redovitih. Kad isplatimo ovih oko 460 tužbi za 460 osoba, to je 2.038.000 KM za sudske nagodbe, mi ćemo očistiti 2015. godinu, ostaje nam još 760 nagodbi u vrijednosti 7.000.000 KM i ostalo ono što je Ivan govorio nije 50.000.000 KM, ali nažalost jeste 40.000.000 KM, računajući tu i tužbu Grada Mostara 9.000.000 KM za korištenje dijela raspale zgrade Đačkog doma, tu sam aktivnosti poduzeo sa gradonačelnikom i dogovorio načelno da tu tužbu sporazumno riješimo na način da se Vlada i županija obveže da će isplatit 7.000.000 KM, odnosno 7.500.000 KM, za Zračnu luku Mostar kroz 7 godina. I to ćete vidjet u rebalansu i to ćete vidjet u proračunu, ako uspijemo to sporazumno riješit tih 9.000.000 KM Gradu Mostaru to je u onih 40.000.000 KM. Međutim, nama se javlja još jedan problem, a to je problem ovog nameta na vilajet, ove nematerijalne štete za dugi rok suđenja, a mi nismo krivi za to, to bi trebalo Vijeće ministara, odnosno Visoko sudsko i tužiteljsko vijeće rješavati i presuda Europskog suda za ljudska prava u Strazburu. Ovo je jedna frustrirajuća situacija koja brine nekoliko županija, ono što ja znam, najveći problem ima Zeničko-dobojska sa 160.000.000

KM, Unsko-sanska sa 150.000.000 KM, mi smo treći. Najkorektnije i najkvalitetnije postavili da riješimo, međutim ovo je ljudi moji najbolji biznis u ovoj državi, tuži državu dobit ćeš je, sa sudskim troškovima, zateznim kamatama, sa duševnom boli, itd., tako da uvezano je tu mnogo čega, itd., ali o tom potom, to je druga tema. Uglavnom mi to rješavamo na jedan dosta kvalitetan način, evo to ćete vidjeti i u proračunu i rebalansu i naredne godine i narednih godina, usvojili smo i akcijski plan, to znate, ali evo radi korektnosti sam se javio, prije svega vezano za softver, ono što je ministar rekao jučer su riješene sve plaće, usmeno informacija. Hvala.

Ivan Odak:

Zaboravio sam maloprije reć tražim napismeno odgovor. Jedna stvar. Druga stvar, treba mi plan kako izići iz ove krize, ko to rješava, ministar financija, valjda neće ministar zaštite okoliša to rješavat? Ne vidim nigdje ni u jednom proračunu, ni prijedlog zakona kako se to rješava. I točna je informacija, razgovarao sam sa jednim odvjetničkim uredom koji se dobro ugradio u ovo, ovdje kad sam počeo radit u ovoj skupštini čuo sam neki izraz „ugraditi se“, hajde znam ovo od rata i ovamo „snaći se, snašao, ovo, ono“, ali „ugraditi se“!? Sad ova presuda što ćete vi isplatit 4.000.000 i nešto KM odvjetnički uredi uzimaju 30%, to je 1.200.000 KM, tu se može ugradit svako u ovo!? Zato kažem, ima ovdje svakakvih interesa i zato premijeru mislim da bi tu trebalo transparentnije rješavati i predložiti način kako izići iz ove krize, 50.000.000 KM duga je iz za bogatije županije, za Sarajevsku županiju je tu puno, a kamoli za našu županiju. Toliko. Hvala.

Šerif Špago:

Zahvaljujem. Informacije radi, Skupština je u prethodnom sazivu donijela odluku kojom se Vlada omogućuje sporazumno donošenje, odnosno potpisivanje sporazuma sa zainteresovanim osobama koje su tužile Vladu u onom smislu da se odreknu kamata, a da im se isplati glavnica. I mislim da taj sporazum u najvećoj mjeri se i poštuje, odnosno ta odluka Skupštine se poštuje. To je bila jedna od mjera koju je ova Skupština dala Vladi, dali ima drugih mjera evo premijer će vjerovatno sa svojim ministrima razmotriti. Ovo samo informacije da imate, znači da je odobrena ta odluka kojom se omogućuje Vladi da sporazumno sklapa sporazume radi izmirenja obaveza po tužbama zaposlenih u HNK-a. A ovo ugrađivanje, ja bi zamolio da svi koji imaju informacije zna se procedura, tužilaštvo i sve ostalo, za sve one za koje sumnjate da se ugrađuju u neke te aranžmane. Zastupnik Grcić, izvolite.

Elvedin Grcić:

Evo hvala predsjedniče. Ja imam jednu da kažem inicijativu, pitanje, ovaj put usmjereno prema ministarstvu poljoprivrede, šumarstva i vodoprivrede. Naime, o čemu se radi. Na području opštine Prozor vrši se sječa šume, ono na prvu ništa neobično, ali ako kažemo da se vrši sječa tehničkog drveta od strane Javnog preduzeća Šumsko-gospodarsko društvo „Šume Hercegovačko-neretvanske“ d.o.o. Mostar, ako uzmemo u obzir činjenice da navedeno preduzeće nema saglasnosti za sječū šume, da ne postupa ni po kakvom zakonu, znamo kakvo je u nas stanje, da se ne obazire na bilo čija mišljenja i zahtjeve protiv ove sječe, da se sječa vrši na imovinu koja nije u njihovom posjedu ili vlasništvu, onda to ima neke druge konotacije. S tim u vezi po reagovanju i prijavama mještana na kojem području se vrši ta sječa, uz ovo neko prešutno stanje ukupno na terenu, možemo reći da je to neko i dopuštanje nelegalne sječe jednom pravnom subjektu, što bi dalje moglo značiti i otvaranje šuma na području naše opštine za nelegalnu sječū i drugim zainteresovanima, što bi dalje dovelo i do potpune devastacije tog šumskog fonda na ovom području. Opština je podnijela i poduzela određene korake obraćajući

se prema Policijskoj stanici Prozor-Rama za vršenje ovog uvida i prijave prema federalnom Pravobraniteljstvu, koje je upozorilo na činjenicu nezakonitog postupanja ovog privrednog društva, prema federalnom ministru poljoprivrede, vodoprivrede i šumarstva, koje je također ukazalo na nezakonito postupanje, federalnoj Upravi za inspekcijske poslove, itd., itd., svi su jednoglasno u ovom stavu da se vrši nezakonita sječa i eksploatacija šumskog dobra, ali se ono i dalje vrši. Pitanja su upućivana i prema Pravobraniteljstvu BiH i prema Vladi HNK-a i prema Ministarstvu poljoprivrede, šumarstva i vodoprivrede HNK-a i evo želim ovdje i da ga ovako postavim na ovaj način i tražim pisani odgovor, šta će se poduzeti u narednom periodu, šta će poduzeti konkretno ministarstvo u čijem sastavu se nalazi i Uprava za šumarstvo koja vrši upravljanje i finansiranje ovog javnog preduzeća, kako i na koji način zaustaviti nezakonitu sječu, dali preko direktora, nadzornog odbora, preko MUP-a, preko tužiteljstva, ili na neki drugi način? Istovremeno jedna dodatna zabrinjavajuća informacija, da kontrola ove sječe, pa i od strane MUP-a vrši na način da se da kažem zaustavljaju i sprječavaju u kršenju ovoga djela pojedinci dok se na neki način žmiri ili propušta rad ovakve sječe od strane preduzeća. Evo toliko. Hvala.

Slavko Bilić:

Pozdravljam sve nazočne. Prvo pitanje, Ministarstvu prometa i veza u Vladi HNŽ-a. Kako je znači poznato Vlada HNŽ-a izdvojila je 700.000 KM za uređenje regionalnog puta R 418 na području općine Prozor-Rama, te ista sredstva uplatila na račun navedene općine. Moje pitanje je, jeli resorno ministarstvo pratilo način utroška navedenih sredstava, te jesu li sredstva namjenski iskorištena? Obrazloženje: moja saznanja o ovoj temi govore da je općina Prozor-Rama natječaj provela nezakonito, odnosno da se nije poštivao najpovoljniji ponuđač i da radovi nisu izvedeni do danas. Stoga evo molim ministarstvo, da mi dostavi informaciju što će poduzeti ili jeli išta poduzelo u svezi ovoga jer znamo gore je put jedan i godinu dana stoji zbog pogrešnog natječaja, a to su sredstva naša ovdje i imamo pravo saznati istinu što se nisu već realizirala u neophodan put od Prozora prema Rami?

I drugo pitanje, evo točno ne znam ni ja jeli Skupštini ili Vladi, ali evo ostavit ću dva primjera, što se tiče lovnog područja, odnosno lovišta na području HNŽ-a. Od nadležnog ministarstva, Vlade HNŽ-a i Skupštine, tražim informaciju kada će Skupština HNŽ-a raspravljati o prijedlogu Odluke o izmjeni i dopuni Odluke o osnivanju lovišta u HNŽ-u? Navedeni prijedlog Odluke o izmjeni i dopuni Odluke o osnivanju lovišta u HNŽ-u, Ministarstvo poljoprivrede, šumarstva i vodoprivrede uputilo je skupštinsku proceduru još 28.12.2015. godine, pod brojem 01-1-02-1946/15. Obrazloženje: odlukom o osnivanju lovišta nanosena je povreda prava lokalne samouprave u Općini Prozor-Rama, što je Ustavni sud Federacije BiH utvrdio svojom presudom još 2014. godine. Temeljem presude Ustavnog suda Federacije BiH, Ministarstvo poljoprivrede, šumarstva i vodoprivrede izradilo je novi dakle prijedlog koji bi trebao ići u skupštinsku proceduru. Koliko je meni poznato, znači evo i prije mog mandata, od 2015. nije bilo na skupštinskoj proceduri i pitanje je hoće li i kada će Skupština ovu temu staviti na dnevni red kako bi se provela presuda Ustavnog suda, a samim tim i stanje u lovištu na području općine Prozor-Rama dovelo u red, ali i drugih općina. Mislim da je ovo neophodan zakon, evo od kad sam ovdje ni zakona o šumarstvu, ni zakona o lovnim područjima, gore u Rami toliko bi se moglo i turistički iskoristiti, možemo reći lovačke sekcije, lovačke udruge, dolaze i iz drugih područja, zaštita životinja, šteta koja se nanosi od divljači na područjima i imanjima, odnosno privrednim dobrima kako to naplatiti, kako i na koji način, i zato mislim da ovu proceduru moramo bar početkom sljedeće godine staviti u proceduru pa da vidimo što je problem, zašto se ne može usvojiti. Toliko. Hvala.

Ismet Lulić:

Evo pozdravljam i ja sve prisutne. Ja imam dvije inicijative i jednu zastupničko pitanje. Prva inicijativa je jeli upućena našoj Vladi, to jeste da Vlada sagleda mogućnost da kroz rebalans budžeta ili na neki drugi način osigura dodatni novac, to jest sredstva za prijem svih pripravnika koji su konkurisali na javni poziv Vlade za prijem pripravnika. Tako da mislim da ovdje ne trebam detaljno obrazlagati, znamo koliko egzodus mladih imamo i mislim da je ovo najmanje šta mi možemo za mlade uraditi, da ih na neki način sačuvamo u našoj domovini.

Druga inicijativa je upućena, upućujem je jeli prema rukovodstvu Skupštine i nadležnoj službi, da dostave informaciju o inicijativama i zastupničkim pitanjima na koje nikad mi kao zastupnici nismo dobili odgovore, da se dostavi tačan datum kad smo se je postavili, kao i tekst same inicijative ili zastupničko pitanje.

I još jedno zastupničko pitanje, koje je upućeno Zavodu zdravstvenog osiguranja, a ono glasi: šta se dešava sa neosiguranim pacijentima koji su oboljeli od Covida u smislu kako se liječe, to jeste jeli bilo takvih slučajeva na bolničkom liječenju i dali su bili oslobođeni plaćanja troškova liječenja? Hvala.

Minela Krpo:

Pozdravljam sve prisutne. Danas imam dvije inicijative. Podnosim inicijativu Skupštini HNK-a, Komisiji za izbor i imenovanja Skupštine HNK-a, te Vladi HNK-a, da se što prije kompletira izbor komesara MUP-a HNK-a. Obrazloženje: već godinama kamen spoticanja je pozicija policijskog komesara, a zbog nepostizanja dogovora i guranja pod tepih velikog broja problema MUP HNK tone sve dublje, štaviše situacija nikad nije bila gora s obzirom na činjenicu da u ovom trenutku MUP-u HNK-a nedostaje čak 300 policajaca, te 50 državnih službenika i namještenika. Policijski odbor ne funkcioniše već 4 godine, ne postoji Javno žalbeni biro, dakle proces imenovanja novih članova Nezavisnog odbora je blokiran. Imali smo i šokantnu situaciju da je komesar Ilija Lasić nezakonito imenovan, šta je dokazano i pravosnažnom presudom. MUP HNK-a je jedan od najbitnijih organa u našem kantonu i njegovo urušavanje zbog političkih prepucavanja ozbiljno ugrožava sigurnost svih građana našeg kantona. Kao majka apelujem da nadležni postignu dogovor i da riješe ovo pitanje radi sigurnosti naše djece.

Druga inicijativa je, moj prijedlog je znači da MUP HNK-a pokrene izmjenu zakona o policijskim službenicima HNK-a, odnosno zakona o izmjeni zakona o policijskim službenicima u HNK-a u pravcu koji se odnosi na proces činovanja. Ispravnim procesom činovanja dovodi se do nesmetanog funkcionisanja MUP-a, odnosno Uprave policije. Tu se traži uvođenje sistema ličnih i funkcionalnih činova. Obrazloženje: zakonom je propisano kako se napreduje iz čina u čin, odnosno koliko je potrebno godina radnog staža i koji broj bodova i ocjena nadležnih da se napreduje iz čina u čin. Na postojeću sistematizaciju Uprave policije ovo treba da se primjenjuje od dana donošenja ove izmjene, zakonom o policijskim službenicima samo se potvrdi stanje u MUP-u, kaže se broj ovlaštenih službenih lica u činu policajac je toliko, ovlaštenih službenih lica u činu narednik je toliko, pa sve do čina glavnog inspektora. Kako funkcionise sistem ličnih i funkcionalnih činova, baza podataka je ta koja samo softverski vodi, nema više konkursa za činovanja i nema više namještanja, a baza radi na sljedeći način, na primjer NN osoba je 2015. zaposlena u Upravu policije u činu policajac, to je funkcionalan čin, nakon dvije godine i dvije ocjene 5 on je automatski dobio lični čin stariji policajac, ali i dalje radi na mjestu sa činom policajca. Opet je prošlo dvije godine, NN osoba prelazi u lični čin narednik i onda dolazimo do situacije do NN osoba radi u Upravi policije već 6 godina, radi na mjestu u činu policajac i to mu je funkcionalni čin a ima lični čin narednik, sa 6 godina staža 6 bodova i ocjene u zbiru 30, e sad u sistematizaciji radnih mjesta pojavilo se upražnjeno radno

mjesto u funkcionalnom činu narednik, baza podataka automatski izbacuje ime i prezime one ovlaštene osobe ličnog čina narednik koji ima najviše godina staža, broj bodova i najbolje ocjene i onda ako je to NN osoba sa svojim ličnim činom narednik, on dobije to mjesto automatski. Tako iz čina u čin, iz godine u godinu svi rade najbolje što mogu i da dobiju što bolje ocjene, a baza softverski ih reda, nema konkursa, nema namještanja i sve je javno i transparentno. Do komesara se lako dođe jer ćemo imati više ovlaštenih službenih lica u činu glavnog inspektora i neće uvijek biti jedan ili dva da se guraju, nego ćemo imati 10 lica a nek Nezavisni odbor izabere. Hvala.

Selma Drljević Sefić:

Pozdravljam sve prisutne. Danas podnosim inicijativu prema Vladi HNK-a i prema Ministarstvu pravosuđa, uprave i lokalne samouprave HNK-a, da upravna inspekcija kantona pokrene inspekcijski nadzor nad administracijom i upravnim odborom Narodnog pozorišta u Mostaru. Obrazloženje: s obzirom da je Narodno pozorište u Mostaru najstarija kulturna institucija u HNK-a, te da iza sebe ima mnogo uspješnih priča kroz historiju, te i sama činjenica da u njoj rade višestruko nagrađivani akademski glumci, u posljednje vrijeme možemo primijetiti i kroz medije da postoje razne špekulacije i malverzacije koje se vode u samoj upravi Pozorišta. Naime, jedna od zadnjih malverzacija je protuzakonito nametanje rješenja o konačnom izboru upravnog odbora Narodnog pozorišta, gdje se krše sve norme, zakonski propisi i poslovnik samog rada uprave. Kao što je poznato upravni odbor se sastoji od 5 osoba, 2 dolaze iz reda zaposlenika, a 3 iz reda osnivača. U aprilu ove godine po zahtjevu Ministarstva nauke, kulture i sporta HNK-a uposlenici Pozorišta su dostavili imena dvojice predstavnika iz reda uposlenika Narodnog pozorišta koji su izabrani putem glasanja na sastanku za upravni odbor, dakle jednoglasno su izabrani, te su dostavili ministarstvu na ruke i elektronski. Međutim, ovog mjeseca, dakle novembra ove godine, dolazi do konačnog rješenja o imenovanju članova upravnog odbora Narodnog pozorišta u kojem dolazi do izmjene jednog člana upravnog odbora koji dolazi iz reda zaposlenika, da budem preciznija, ovdje se radi dakle da se izbacio akademski glumac, a ubacio se komunikolog na to mjesto člana upravnog odbora iz reda zaposlenika iako se ta dotična osoba prijavila na konkurs za vanjskog člana upravnog odbora, a na sastancima uposlenika kada su birali članove dakle dotična persona nije niti bila prisutna. I samim tim ovo novo rješenje i taj sastav upravnog odbora, sa tih 5 članova je jednonacionalan te otpada onaj član jedini koji je dolazio iz reda Ostalih. Ovdje dovodimo u pitanje sam rad uprave Pozorišta i namještanje poslova i pozicija unutar istih, ljudi se zapošljavaju bez konkursa, a nadležni šovinističkim postupcima degradiraju i podcjenjuju sam rad uposlenika, opet napominjem umjetnika, višestruko nagrađivanih akademskih glumaca. Stoga molim vladu i ministarstvo pravosuđa, tačnije upravnu inspekciju, da raskrinkaju malverzacije, prevare i krivična djela koja se rade protiv zaposlenika i same kulturne ustanove jer ovim postupcima se ona ruši i ponižava. Toliko. Hvala.

Aner Žuljević:

Zahvaljujem predsjedniče. Pitanje ide prema Ministarstvu unutrašnjih poslova HNK-a i Ministarstvu finansija HNK-a. Jeli tačno da je uplaćen doprinos preko Poreske uprave za policijske službenike za period 31.10.2014. do 28.06.2015. godine, a da nisu uplaćene osnovne plate, mada je to naloženo i pravomoćnom sudskom odlukom i još na banci po konkretnom pitanju stoji ovrha za plate i doprinose? Kako je moguće da po ovom pitanju na obrascu Poreske uprave JS 3650 stoje podaci o uplaćenim bruto primanjima, znači osnovne plate, kao i na listingu PIO, a da to nije izvršeno kada je u pitanju ministarstvo unutrašnjih poslova? Znači pitanje ide i finansijama i ministarstvu unutrašnjih poslova.

Drugo je, inicijativa prema kolegiju. S obzirom da je Ured za reviziju F BiH uradio reviziju 2 ministarstva u 2020. godini, mi smo dužni i po zakonu da ta dva dokumenta razmatramo na prvoj od narednih sjednica Skupštine. Tu je nažalost evidentno ono što smo mnogo puta ranije i osvjedočili kada je u pitanju potrošnja javnog novca, revizija je kod ministarstva obrazovanja utvrdila mišljenje s rezervom i da je gotovo 15.000.000 KM praktično trošeno budžeta a da to nije rađeno u skladu sa zakonom o budžetima i pravilnikom o finansijskom poslovanju i donacija online platforme za učenje od 28.665 KM nije uopšte registrovana na način kako je to propisano, mi smo nešto primili kao donaciju, pa onda platili održavanje na to, pa se postavlja pitanje dali se praktično ovdje radilo o izbjegavanju zakona o javnim nabavkama kroz donaciju, a onda se kroz dodatne radove i održavanje tog sistema ustvari nadoknadilo sve to, da ne kažem da je potvrđeno ono što smo mi imali polemiku i što nikad nam nije dostavljeno ovdje nažalost, zbog čega smo i rekli da je transparentnost ove Vlade vrlo upitna kad je podijeljeno 220.000 KM medijima, a ovdje je revizija vrlo jasno utvrdila da je i njima onemogućeno da bilo šta vide ni kakav je to bio javni poziv ni kako je to dodijeljeno, ni kome je dodijeljeno, uglavnom prekršeno je sve što se je moglo prekršiti u tom smislu. I ja tražim od naredne sjednice Skupštine da mi raspravimo o ova dva izvještaja, pogotovo ministarstvu unutrašnjih poslova, imate 460.000 KM javnih nabavki koje nisu u skladu sa zakonom, 80.000 KM je isplaćeno javnog novca po pojedinim doplatama na plate, a da za to nije regulisano pravilnikom. S obzirom da sam ja neko ko na kraju ovo će sve uputiti u Tužilaštvo pa kako kod da završi, radi se o dokumentu kojem je mjesto tamo, red bi bilo da prije toga i Skupština razmotri ove dokumente i da naravno svi oni koji su bili predmet ove revizije imaju pravo da kažu sa svoje strane zbog čega su se našli u ovakvoj ocjeni i završnom izvještaju, prije nego što sve ovo postane predmet Tužilaštva jer se radi o ozbiljnim malverzacijama i javnim sredstvima, koje na kraju vrlo jasno utvrđuje da se zakoni ne poštuju i da je jedan jedini kriterij koji postoji za značajan izvor finansijskih sredstava ustvari politički kriterij koji nigdje ne piše u zakonu. Toliko. Zahvaljujem.

**AD 2. a) Odluka o prestanku mandata poslanika u Skupštini HNK;
b) Odluka o verifikaciji mandata poslanika u Skupštini HNK;**

a) Odluka o prestanku mandata poslanika u Skupštini HNK

Predsjedavajući Skupštine HNK Šerif Špago pročitao je Odluku:

„Skupština Hercegovačko-neretvanskog kantona je na sjednici održanoj dana 24.11.2021. godine donijela Odluku o prestanku mandata poslanika u Skupštini HNK;

Član 1, Nevenku Hercegu poslaniku u Skupštini Hercegovačko-neretvanskog kantona izabranom na Općim izborima 2018. godine sa liste političkog subjekta HDZ BIH, HSS, HKDU BIH, HSP-HNS, HSP DR AS BIH, HDU BIH, utvrđuje se prestanak mandata sa danom 01.10.2021. godine;

Član 2, ova odluka stupa na snagu danom donošenja i objavit će se u Službenim novinama Hercegovačko-neretvanskog kantona.

Otvorena je rasprava:

U raspravi nije nitko učestvovao.

Obavljeno je glasanje o navedenoj odluci.

Nakon glasanja konstatovano je da je navedena Odluka jednoglasno usvojena.

b) Odluka o verifikaciji mandata poslanika u Skupštini HNK

Predsjedavajući Skupštine HNK Šerif Špago pročitao je Odluku:

Na osnovu odluke Centralne izborne komisije BiH, broj 06-1-07-1-527/21, od 20.10.2021. godine, Skupština HNK na sjednici održanoj dana 24.11.2021. godine donijela Odluku o verifikaciji mandata poslanika u Skupštini HNK.

Član 1, verifikuje se mandat sljedećem poslaniku u Skupštini HNK i to pod 1) Dejanu Kvesiću, HDZ BIH, HSS, HKDU BIH, HSP-HNS, HSP DR AS BIH, HDU BIH.

Član 2, ova odluka stupa na snagu danom donošenja i objavit će se u Službenim novinama Hercegovačko-neretvanskog kantona.

Otvorena je rasprava:

U raspravi nije nitko učestvovao.

Obavljeno je glasanje o navedenoj odluci.

Nakon glasanja konstatovano je da je navedena Odluka jednoglasno usvojena.

Zastupnik Dejan Kvesić je dao svečanu izjavu.

AD 3. Prijedlog Strategije razvoja HNK-a za period 2021. – 2027. godina

Obrazloženje je dao Nevenko Herceg, predsjednik Vlade HNK.

Otvorena je rasprava.

U raspravi su učestvovali: Stana Burić, Slađan Bevanda ministar MUP HNK, Marija Bešker, Vesna Saradžić, Amir Šelo, Aner Žuljević, Slavko Bilić, Milica Pehar i Nevenko Herceg.

Predsjedavajući Skupštine HNK Šerif Špago pročitao je Prijedlog Odluke o usvajanju Strategije razvoja HNK za period 2021.- 2027. godina:

1) Usvaja se Strategija razvoja HNK za period 2021.-2027. godina;

2) Strategija iz tačke 1 odluke čini sastavni dio odluke;

3) Odluka stupa na snagu danom donošenja i objavit će se u Službenim novinama HNK;

Obavljeno je glasanje o navedenoj Odluci.

Većinom glasova „Za“ uz 3 „Suzdržana“ glasa usvojena je Odluka o usvajanju Strategije razvoja HNK za period 2021.- 2027. godina.

Predsjedavajući je konstatovao da će se Strategija razvoja objaviti u Službenim novinama nakon tehničke dorade i lektorisanja, a to će utvrditi Vlada HNK.

AD 4. Prijedlog Zakona o izmjenama i dopunama Zakona o poljoprivrednom zemljištu u HNK

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi su učestvovali: Šerif Špago i ministar Donko Jović.

Ministar Jović je u ime Vlade HNK iznio da je Vlada djelomično prihvatila amandman Kluba poslanika Bošnjaka na član 1. Zakona, tako da član 1. Zakona sada glasi:

„U Zakonu o poljoprivrednom zemljištu Hercegovačko-neretvanskog kantona („Službene novine HNK“, broj 8/13) u članu 31. stav (3) u devetom redu iza riječi „energije“ dodaju se riječi: „kao i stambenih, poslovnih i rekreacionih zona“.

U stavu (4) riječi „može donijeti i“, mijenjaju se riječju „donosi“.

Predsjedavajući Špago je ponovio član 1., a nakon prihvatanja amandmana obavljeno je glasanje.

Većinom glasova „Za“, uz 1 glas „Protiv“ usvojen je Prijedlog Zakona o izmjenama i dopunama Zakona o poljoprivrednom zemljištu u HNK.

AD 5. Nacrt Zakona o termoenergetskoj inspekciji;

Obrazloženje je dao Željko Laketić, ministar privrede u Vladi HNK.

Otvorena je rasprava.

U raspravi su učestvovali: Šerif Špago i ministar Laketić.

Predsjedavajući Skupštine HNK Šerif Špago predložio je slijedeći Zaključak:

1) prihvata se Nacrt zakona o termoenergetskoj inspekciji kao dobra osnova za izradu prijedloga zakona;

2) primjedbe, prijedlozi i mišljenja iznesena na sjednici Skupštine dostavit će se Vladi HNK-a na razmatranje;

3) ostavlja se rok od 15 dana da zastupnici dostave dodatne prijedloge, mišljenje i sugestije na nacrt zakona u pisanom obliku;

4) zaključak stupa na snagu danom donošenja i objavit će se u Službenim novinama HNK.

Obavljeno je glasanje o navedenom Zaključku.

Nakon glasanja konstatovano je da je Nacrt Zakona o termoenergetskoj inspekciji jednoglasno prihvaćen.

AD 6. Nacrt Zakona o elektroenergetskoj inspekciji

Obrazloženje je dao Željko Laketić, ministar privrede u Vladi HNK.

Otvorena je rasprava.

U raspravi su učestvovali: Đuro Prkačin, Tomislav Martinović, Šerif Špago i ministar Laketić.

Predsjedavajući Skupštine HNK Šerif Špago predložio je slijedeći Zaključak:

1) Prihvata se Nacrt zakona o elektroenergetskoj inspekciji kao dobra osnova za izradu prijedloga zakona;

2) Primjedbe, prijedlozi i mišljenje iznesena na sjednici Skupštine dostavit će se Vladi HNK-a na razmatranje;

3) Ostavlja se rok od 15 dana da zastupnici dostave dodatne prijedloge, mišljenja i sugestije na nacrt zakona u pisanom obliku;

4) Zaključak stupa na snagu danom donošenja i objavit će se u Službenim novinama HNK.

Obavljeno je glasanje o navedenom Zaključku.

Nakon glasanja konstatovano je da je Nacrt Zakona o elektroenergetskoj inspekciji jednoglasno usvojen.

AD 7. Izmjena i dopuna Odluke o izboru predsjedavajućeg, zamjenika predsjedavajućeg i članova radnih tijela Skupštine HNK

Predsjedavajući Skupštine HNK Šerif Špago pročitao je Odluku:

Odluka o izmjeni i dopuni Odluke o izboru predsjedavajućeg, zamjenika predsjedavajućeg i članova stalnih radnih tijela Skupštine HNŽ/K:

Član 1), Odluka o izboru predsjedavajućeg, zamjenika predsjedavajućeg i članova radnih tijela Skupštine HNK/Ž broj 02-01-II-075/19 od 15.10.2019. godine, Službene novine HNK broj 7/19, član 1 mijenja se na način: tačka 8 mijenja se i glasi-razrješava se zamjenik predsjedavajućeg komisije za građenje, prostorno uređenje i zaštitu okoliša Kenan Memić. Za zamjenika predsjedavajućeg komisije za građenje, prostorno uređenje i zaštite okoliša izabrana je Minela Krpo.

Razrješava se član Komisije za građenje, prostorno uređenje i zaštitu okoliša Nevenko Herceg. Za člana Komisije za građenje, prostorno uređenje i zaštitu okoliša izabran je Dejan Kvesić.

Član 2), Odluka stupa na snagu danom donošenja i objavit će se u Službenim novinama HNŽ/K.

Otvorena je rasprava o navedenoj Odluci.

U raspravi nije nitko učestvovao.

Obavljeno je glasanje o navedenoj Odluci.

Nakon glasanja konstatovano je da je navedena Odluka jednoglasno usvojena.

AD 8. Zaključak o trenutnom stanju u dijelu zdravstvenih ustanova u HNK

Otvorena je rasprava.

U raspravi su učestvovali: Elvedin Grcić, Šerif Špago i Tomislav Martinović.

Predsjedavajući Skupštine HNK Šerif Špago predložio je slijedeći Zaključak:

1) Skupština HNK traži od Vlade HNK da hitno zatraži od Vlade F BiH donošenje zaključka kojim bi se omogućilo deblokiranje računa JU Dom zdravlja Konjic i JU Opšta bolnica Konjic;

2) Skupština HNK traži od Vlade F BiH da što prije uputi u parlamentarnu proceduru Prijedlog Zakona o finansijskoj konsolidaciji javnih zdravstvenih ustanova u F BiH, čime bi se riješio jedan dio problema poslovanja javnih zdravstvenih ustanova u F BiH;

3) Zadužuje se Vlada HNK da dostavi informaciju o trenutnom stanju poslovanja javnih zdravstvenih ustanova čiji su osnivači HNK-a i jedinice lokalne samouprave u kantonu.

4) Zaključci stupaju na snagu danom donošenja i objavit će se u Službenim novinama HNK-a.

Obavljeno je glasanje o navedenom Zaključku.

Nakon glasanja konstatovano je da je navedeni Zaključak jednoglasno usvojen.

AD 9. Zaključak o dostavljanju izvještaja o realizaciji zaključka Skupštine HNK-a broj 02-01-017/21, od 26.01.2021. godine

Obrazloženje je dao zastupnik Slaven Raguž.

Otvorena je rasprava.

U raspravi nije nitko učestvovao.

Predsjedavajući Skupštine HNK Šerif Špago predložio je slijedeći Zaključak:

„Zadužuje se Vlada HNK-a i nadležno ministarstvo da dostave izvještaj o realizaciji zaključka Skupštine HNK-a broj 02-01-017/21, od 26.01.2021. godine. Izvještaj dostaviti u roku od 30 dana“.

Obavljeno je glasanje o navedenom Zaključku.

Nakon glasanja konstatovano je da je navedeni Zaključak jednoglasno usvojen.

Sjednica je završena u 16:00 sati.

Zapisničar
Dario Topić

Predsjedavajući
Šerif Špago